

國朝先正事略

國朝先正事畧卷之二 名臣

平江李元度次青纂

李敏壯公事畧

子海爾圖

桑額

李公國翰字伯藩漢軍鑲藍旗人父繼學初以商人隨明經畧楊錦軍通使我朝天命中大兵取遼陽繼學來歸授都司累官副將錫爵三等男尋以老致仕公襲父爵任侍衛生而明敏勇銳

太祖嘉之賜號墨爾根天聰三年從征明北京還攻永平先眾步戰斬獲多五年圍大淩河城內兵突出公力戰卻之旋攻克其臺又擊敗明兵之自錦州赴援者九年晉二等男崇德三

年隨貝勒岳託伐明於邊外發敵所藏火藥數處比入邊遇敵兵據山列陣公奮擊敗之獲馬四十進克牆子嶺轉戰至山東克濟南府師還拔望都獲鹿二城尋授副都統五年隨睿親王多爾袞圍錦州攻克呂洪山臺擊敗山口步兵敵兵自松山遁入高橋迤南三臺公偕眾攻克之斬級百餘生擒副將王希賢等七年明總督洪承疇就擒總兵祖大壽以錦州降移師攻克塔山杏山並在事有功晉一等男加一雲騎尉擢都統八年隨鄭親王濟爾哈朗取明前屯衛中後所二城晉三等子順治元年

世祖章皇帝定鼎燕京公同都統劉之源等帥兵勦滅饒陽土

賊與賊帥掃地。王遇一戰，斬之。進征山西，時流賊李自成遁。西其黨猶分踞太原、平陽等府。公與都統葉臣等合兵攻克太原。復分兵勦賊於汾。山西既平，隨英親王阿濟格征陝西。屢敗賊眾，自成遁。湖廣移師追勦之。攻賊應山，進征武昌。與都統金礪等奪賊艘數百。二年冬，命偕都統巴顏征四川。甫至西安，值叛鎮賀珍自漢中糾賊黨孫守法等來犯。公與駐防內大臣和洛輝約期兩路夾攻，斬級無算。三年春，肅親王豪格統師至西安，遣公及巴顏搜勦延安餘賊，追至張果老崖，掘濠困之。乘夜攻克其寨，殲賊首，獲馬二百有奇。遂隨肅王征四川，滅流賊張獻忠於西。克復帥師渡涪江，擊敗偽總兵袁韜等。五年。

命爲定西將軍。同平西王吳三桂鎮漢中。六年，僞王朱森釜僞侯趙榮貴糾眾萬餘犯階州。公先眾趨擊陣，斬森釜榮貴，尋敗僞將軍王永強，斬級數千，獲駝馬數百。復宜君同官蒲城宜川安塞清澗等縣。

上深嘉其勇畧，竝諭以自後，但發縱指示，不必身先士卒。時叛鎮姜瓖踞大同，其黨劉登樓張鳳翼等分踞城邑。公遣兵會勦，殲賊甚眾。招撫河東諸處，攻復府谷縣，擒斬僞經畧高有才及僞官三百有奇。招降僞總兵郝自德等。先是張獻忠旣滅，其黨孫可望劉文秀白文選李定國等竄遁，旣而降附，明桂王朱由榔與其所設官屬並據川東川南。九年，公同三桂督兵克復

成都嘉定擒斬僞總兵李明廷林時泰龍名揚等文秀文選皆
敗走別遣將分徇重慶敘州皆下之僞將軍王復臣等糾猥
列象陣合眾五萬犯保甯薄城下公自綿州聞警趨援率兵奮
擊斬復臣及賊萬餘捷聞

上放賜紫貂冠服及金甲紫韃鞍馬等物初公以戰功游晉一
等伯至是晉三等侯可望懲保甯之敗與定國併力犯湖廣不
復窺川公奉詔同三桂還鎮漢中而僞侯譚文譚宏譚詣與
自成遺黨劉三虎等聯結爲寇尋復陷重慶使僞都督杜子香
據之十五年三月公同三桂進征山南郡西充至合州子香迎
戰敗遁遂復重慶以總兵嚴自明置鎮而自與三桂進兵桐梓

偽總兵王友臣降遂趨遵義偽將軍劉正國據險隘拒戰我師
擊之潰由水西遁入雲南遂取遵義及所屬州縣五月進擊偽
將軍楊武等於開州斬級千餘盡獲其象馬器械開州及附近
城邑俱降水西土司安坤等並歸順當是時甯南大將軍洛託
與經畧洪承疇已取貴陽公與三桂奉 詔俟信郡王多尼征
南將軍卓卜特兩路兵並進雲南乃還駐遵義七月薨於軍喪
至京

世祖命內大臣致奠贈太子太保 賜祭葬如典禮諡敏壯雍
正十年 詔入祀賢良祠其侯爵既襲三次例改三等伯乾隆
十五年加伯號曰懋烈長子海爾圖順治三年隨征西安進征

四川並有功。授副都統。予騎都尉世職。十一年擢戶部侍郎。隨征南將軍珠瑪喇。勦李定國於廣東。之新會。晉輕車都尉。兼一雲騎尉。十六年任都統。康熙元年襲爵。十四年定西將軍。洞鄂征叛。鎮王輔臣。命海爾圖參贊軍務。十八年大軍征四川。撫遠大將軍圖海疏請令駐守鳳翔。尋隨征雲貴。二十年夏薨於軍中。賜祭葬如例。第三子桑額。由護衛遷參領。擢總兵。康熙十二年晉雲南提督。未抵任。值吳三桂反。留駐荊州。改湖廣提督。十三年春賊將吳應麒陷岳州。順承郡王勒爾錦統師駐荆州。令桑額移守武昌。尋隨貝勒察尼規復岳州。由城陵磯進。勦以隊沈賊船。大敗賊於七里山下。加右都督。十七年秋賊由洞。

庭湖乘風出犯率將領奮擊敗之殪賊百餘獲船四明年正月
岳州賊遁桑額收復華容石首安鄉等縣晉左都督詔趣大
兵滅賊收疆仍授雲南提督十九年春攻克辰龍關復辰沅進
征鎮遠平越貴陽安順及永甯州屢敗賊眾遂趨雞公背鐵索
橋賊聞風震懼焚橋遁隨督土司何起龍等造浮梁濟師二十
年隨大將軍貝子彰泰圍雲貴省城逆孽吳世璠窮蹙賊帥馬
寶胡國柱俱自四川還救桑額率兵勦賊楚雄馬寶踞烏木山
列陣桑額與副都統託岱等分三路進擊賊潰遁窮追五十里
馬寶赴大將軍賴塔軍前降尋磔死桑額與都統希福搜勦胡
國柱於永昌截守潞江詭要隘國柱度不能脫自縊死其黨皆

降雲南平二十五年三月卒於官子李袖官至副都統

珠裏敏公事畧

公諱珠瑪喇。姓畢魯氏。世居葉赫。

太祖時。率所部虎爾哈人來歸。隸滿洲鑲白旗。任佐領。天聰三年。隨大兵入明邊。抵遵化州。擊敗敵兵。閱三日。

太宗親臨遵化。明兵赴援。將入城。公率哨卒十人至。擊斬甚眾。抵燕京。遇明總兵滿桂。黑雲龍。麻登雲。孫祖壽等軍。入大紅門。公與額駙揚古利等擊敗之。旋克永平。復攻昌黎。奮勇先登。身被六創。授騎都尉。世職。尋坐事免。五年。圍大凌河城。明監軍道張春赴援。公連戰破其前後隊。六年。從征察哈爾。獲其台吉。殲從者百餘人。俘其妻子。以歸。七年。從攻旅順口。率護軍十人乘

船登岸攻襄城步軍統領巴奇蘭曰誰能用命先登者公與佐
領雍舜超躍而上向敵大呼曰我珠瑪喇登城矣連被三創不
少卻卒拔之

太宗嘉歎親酌金卮以賜復騎都尉世職九年隨貝勒多鐸攻
錦州夜設雲梯薄城受創甚劇崇德元年征朝鮮自山巔力攻
奪其寨門大兵繼之遂不戰而入又率師入明邊助總兵海某
軍取四邑師還擊敗開平兩營兵三年授兵部理事官從圍錦
州率甲士四十人攻襲廣甯城北山寨收降駱駝山兵眾又與
都統石廷柱招降大凌河北山四寨復坐事奪世職六年隨鄭
親王濟爾哈朗圍錦州收敵騎之來奪我紅衣礮者敵復悉銳

犯我軍公注矢射之皆應弦仆敵駭退七年征松阿里江虎爾哈部招降十屯俘丁壯千餘及牲畜輜重以歸命禮部官迎勞宴賚之順治元年以參領從睿親王入山海關擊敗流賊李自成授副都統遷兵部侍郎復世職明年冬命以副都統駐防杭州時明福王之大學士馬士英竄嚴州與其總兵方國安糾眾犯餘杭公帥師擊走之遷距杭城三十里突遇土賊復大破其眾國安等仍聚眾數萬屯江東諸山及杭州之朱橋范村所在肆掠公遣將分勦悉平之三年從征福建與護軍統領敦拜擊敗僞總兵黃某等軍敘功加一雲騎尉五年隨征南大將軍譚泰勦江西叛鎮金聲桓敗賊兵七萬又與都統和洛輝等

連敗賊兵燔其戰艦千三百有奇招撫九江計府一縣七晉輕
車都尉八年擢都統遷吏部尚書遇恩詔晉爵三等男逾年
坐銓選外誤罷尚書任專管都統事十一年張獻忠餘黨孫可望
李定國自雲貴寇廣西分兵犯廣東連陷郡邑公奉命爲
靖南將軍借敦拜往征之賜敕諭以安民爲首務令嚴飭兵
將恪遵紀律時定國寇新會平南王尚可喜靖南王耿繼茂等
先率兵往援至三水分布沿江隘口以待大軍比公至遂合兵
進擊敗賊於珊洲斬僞副將一擒賊將十餘人斬首百五十餘
級旣抵新會定國糾步騎四萬分據山峪列礮象拒戰我索倫
勁騎馳突貫其陣賊大敗定國復出兵四千自山嶺馳下迎截

我師又敗之奪其山定國遁走捷聞得旨嘉獎定國尋竄高州公遣副都統畢力克圖等分兵追躡敗定國於興業再敗之橫州定國渡江焚橋走官兵躡之三戰皆捷定國率殘兵走賓州入南甯竄安隆公與尙可喜等遂復高雷廉等屬計府三州四縣八及粵西州二縣四獲象十六馬二百有奇器械無算賜敕獎諭勉以益勵忠勤垂名永久九月班師

世祖召見於南苑諭閣臣曰珠瑪喇以元戎統領大兵出征廣東捷歸今五旬矣如此年南建立大功眞福人也賜茶獎勞部臣敘功擬晉一等男

上以公功多不應循常格議敘特晉三等子康熙元年薨年

五十有八 賜祭葬如例諡褒敏次子博通鄂襲爵

甯文毅公事畧

文恪公類色赫
襄壯公根特

襄壯公褚庫

甯公諱完我字公甫遼陽人天命初來歸事貝勒哈廉隸漢軍
正紅旗

太宗文皇帝召直文館尋授參將天聰四年大軍破永平命
同館臣達海等執黃旗登城諭士民安業尋隨貝勒阿巴泰等
守永平又從征大凌河及察哈爾並招撫有功授騎都尉世職
先是公會疏請立六部設言官至五年冬復疏言六部已立未
設言官者意以爲國人皆得進言耶又或謂南朝多設言官竟
至敗壞耶臣請明辨之我國未立六部以前臣不具論六部
既立後曾見有疏劾人罪者否今日秉政者豈盡循良方正在

屬下者既不敢非其長官。旁人孰敢輕議權貴。古云兼聽則聰。偏聽則蔽。一設言官。人必自斂。君身尙許諫諍。他人安有忌諱。此古帝王明目達聰之大用也。南朝言官之弊。由伊主之鑑別不明。非其祖制之不善也。尋與范公文程馬公國柱疏陳伐明之策。又言頃奉 聖諭。各舉薦賢能以供任用。甚盛舉也。孰意無知之輩。卽假此爲倖進之階。臣思古者薦人。功罪必連。坐所以杜弊端而防冒濫。伏願再頒 明詔。自後所舉之人。或效能收功。或僨事獲罪。皆令舉者同之。若其砥行於厥初。改節於末路。許舉者隨時檢舉。乃免連坐。如此庶人知畏法而所得皆真才矣。

太宗並嘉納之。十年春罷職。先是公畱守永平。以好博爲人所訐。奉諭詣戒。至是復與參領劉士英博。事發。奪世職。遂閒居數年。

世祖皇帝定鼎後。起學士。順治二年。授宏文院大學士。充明史總裁官。二年至六年。三充會試主考官。又充實錄總裁官。并繕繹三國志。洪武寶訓。諸書告成。賜賚優渥。授輕車都尉。世職。八年。改國史院大學士。十年。授議政大臣。十一年。疏劾大學士陳名夏奸亂日甚。黨局日成。列其罪狀。請敕大臣鞠訊。論如律。尋加太子太保。十三年。加少傅。兼太子太傅。十五年。以老乞休。奉諭。大學士甯完我効力多年。勤勞素著。今因年邁有疾。

可原銜致仕以遂頤養。康熙元年。

聖祖念其贊理機務年久。命以一子補用學士。四年四月。蒙賜祭立碑。謚文毅。後入祀賢良祠。其時與公同祀賢良者凡三人。曰額色赫。曰褚庫。曰根特。

額色赫。公姓富察氏。滿洲鑲白旗人。世居納殷。祖莽吉圖。

太祖時來歸。公初事。

太宗。授兵部理事官。天聰九年。隨副都統巴奇蘭征黑龍江。先還奏捷。崇德三年。擢秘書院學士。五年。賚敕赴錦州。諭睿親王多爾袞駐兵機宜。會都統圖爾格敗明兵於木輪河。公以捷還奏。六年秋。明總督洪承疇率眾十三萬。援錦州。至松山。公

受

上方畧往諭統軍王貝勒等尋還奏敵勢甚眾宜益兵
上遂統師親征擊敗之七月鄭親王濟爾哈朗克錦州祖大壽
降公至軍營宣諭慰撫降眾八年隨貝勒阿巴泰伐明至山
東下兗州順治元年隨大軍入關定燕京授騎都尉加一雲騎
尉五年遷刑部啟心郎八年擢國史院大學士九年總裁實錄
充會試正考官列議政大臣復主武會試晉一等輕車都尉十
二年加少保兼太子太保再充會試正考官方纂輯

太祖

太宗聖訓又奉諭取經史中忠臣孝子賢人廉吏之事蹟語

言分類採輯成書名曰資政要覽以公爲總裁十三年奉敕使朝鮮鞫獄晉少傅兼太子太傅廕一子入監十五年改保和殿大學士十六年詔獎奉職勤勞諸臣晉少師兼太子太師十八年十月薨賜諡文恪

褚庫公姓薩爾圖氏滿洲鑲黃旗人先世居札魯特遷居葉赫天聰五年大兵圍明大凌河公年十七從征有蒙古驍將徹濟格突陣公迎擊之搏鬪竟日生擒以歸尋征大同攻萬全衛公首先登城頸被創仍力戰卒破其城子駒都尉世職賜號巴圖魯授佐領兼參領崇德三年任吏部理事官順治元年隨英親王阿濟格追勦流賊李自成由廣西至湖廣賊將吳伯益率

黨三千拒戰。公奮擊敗之。三年，隨肅親王豪格征流賊張獻忠。敗賊將高汝勵等於陝西。進師四川，復屢敗賊兵。六年，隨大軍征叛鎮姜瓖，圍大同。僞總兵楊振威糾賊犯正紅旗汛地，並擾土默特營。公連擊卻之。又犯鑲藍旗汛地，公與參領瑚葉赴援。以步戰敗賊騎兵。賊平，還京。尋以值宿失印鑰，解理事官任。仍管佐領兼參領。九年，隨都統噶達琿征鄂爾都斯部。叛酋多爾濟於賀蘭山俘馘甚眾。晉輕車都尉。十三年，海寇鄭成功犯福州。時鄭親王世子濟度統師至漳州。遣公及副都統阿克善赴援。賊以戰艦二百自烏龍江來犯。公率本翼兵登舟奮擊，大敗之。追至大江口，獲船十二。賊又以千餘眾迎戰江岸。公督兵奮

擊斬級二百有奇。康熙二年擢副都統。七年以老告歸。十四年卒。賜祭葬如典禮。諡襄壯。子海存襲世職。

根特公。姓瓜爾佳氏。世居尼馬察。父尼努當。

太祖時率眾來歸。任佐領。隸滿洲鑲藍旗。授騎都尉。世職。天聰八年隨副都統巴奇蘭征黑龍江。虎爾哈部有功。加一雲騎尉。旋軍時有蒙古兵弗戒於火。尼努被焚死。公襲職。尋任刑部理事官。順治元年睿親王統師入山海關。討流賊。公署前鋒參領。敗賊將唐通於一片石。追勦李白成。至望都。復勦撫馬勝。口七賊。晉輕車都尉。四年授協領。駐防西安。時叛賊王光泰據鄖陽。詔侍郎喀喀木率禁旅自河南進征。並調西安駐防兵會勦。公

率兵敗賊黨。雖以鍾等於房縣。旋師復敗。賊方國成於谷。六年。叛鎮姜瓖踞大同。其黨虞允白璋。張萬全等陷平陽。蒲州。及臨晉。猗氏。河津。諸邑。公隨總督孟喬芳統兵渡河。勦賊。復蒲州。臨晉。河津。進征平陽。白璋糾步騎六千至滎河。迎戰。公奮擊大破之。斬三千餘級。後進賊至黃河。賊未及濟。我師薄之。溺水死者無算。遂斬白璋。餘賊竄入吉鎮。悉殲焉。移師趨猗氏。偽監軍喬登芳依山結寨。與張萬全爲犄角。以抗公。分兵擊斬萬全。殲其眾。移兵轉戰。生擒登芳。陣斬偽將王國興等三十人。復敗偽都督郭中傑兵於聞喜。追奔三十里。斬獲無算。仍還駐西安。九年。還京。授參領。十年。偽秦王孫可望與其黨馮雙禮。白文選。馬

進忠等踞武岡寶慶公隨貝勒屯齊征之自永州趨寶慶賊眾十餘萬扼險抗拒公鼓勵將士分路截擊以驍騎衝陣賊眾遂亂時正黃正紅二旗兵方與賊戰公復躍馬往夾擊之賊大敗進征武岡有牧馬賊千餘來犯又敗之十一年九月從甯海大將軍伊爾德往浙江進攻舟山以右翼兵擊敗偽伯阮思及陳六御兵獲其戰艦及紅衣礮復舟山晉爵一等男授副都統康熙十六年擢都統列議政大臣二十三年以老病乞休三十二年薨賜祭葬如典禮諡襄壯子裕圖肯襲爵

圖文襲公事畧

公諱圖海。姓馬佳氏。字麟洲。滿洲正黃旗人。初出筆帖式。加員外郎銜。順治二年。改國史院侍讀。八年。

世祖幸南苑。公負寶以從。

上見其舉趾嚴重。立授秘書院學士。九年。恩詔。予騎都尉世職。越歲。授宏文院大學士。列議政大臣。十二年。加太子太保。攝刑部尚書事。明年。考滿。加少保。十五年。命同大學士巴哈納等。校訂律例。旋以承審江南考試作弊事。遲延。削加銜。明年。坐讞事失實。

上詰問。不以實對。下廷臣察議。論死。得旨寬免。仍奪職。十八

年正月

世祖龍馭上賓遺命起用

聖祖御極卽授滿洲都統康熙二年秋流賊郝搖旗劉體純李來亨等自四川嘯聚湖廣鄖襄山中命爲定西將軍副靖西將軍都統穆里瑪率禁旅會楚蜀之師討之至則與總督李國英提督鄭蛟麟等連營困之賊以兵三千來犯公率兵邀擊敗之賊又連犯諸營各分兵夾擊咸潰敗未幾郝搖旗爲副都統杜斂所擒劉體純相繼破滅惟李來亨擁眾據茅麓山負固公率兵圍之絕其聲援搜劔外寇畧盡賊窮蹙來亨闔門自經死僞公僞將軍以下僞官五百八十餘人以兵八千八百降執斬

僞新樂王及僞官七人俘其家口三千餘眾還。六年拜宏文院大學士。晉輕車都尉。世職充實錄總裁官。七年命測儀象八年命錄刑部重囚並刑。旨九年奏乞解機務專力戎行。

上慰問之。十一年命清理刑獄會吳三桂耿精忠叛。

上以籌餉需才命攝戶部尚書。十四年疏請通飭外省勿私派軍需勿先期拘集夫役勿額外科斂錢糧詞訟重者速審結小者勿濫準滋累。衙蠹土豪勿令魚肉良善奉旨允行。時察

哈爾蒙古布爾尼劫其父阿布柰以叛。公奉命爲副將軍同撫遠大將軍信郡王鄂札率師往討。四月師次達祿布爾尼設伏山谷別以兵三千來拒我師。我師進攻伏發我士默特兵當

之敗。公分兵。鏖擊賊。以四百騎。繼至力戰。殲之。布爾尼乃悉眾。出用火器拒戰。公令嚴陣以待。賊敗。復聚。連擊大破之。招撫人戶千三百有奇。布爾尼僅以三十騎遁。追斬之。察哈爾平班。師上御南苑。大紅門迎勞之。敘功。晉一等男。十五年二月。

上以貝勒洞鄂攻叛將王輔臣於平涼。未克。命公爲撫遠大將軍。總轄陝西全省。貝勒以下咸聽節制。三月。至平涼。明賞罰。申約束。軍威大振。賊眾聞之。懼。諸將請乘勢攻城。公曰。仁義之師。先招懷而後征伐。吾奉天威討凶。豈無慮不克。顧念城中數十萬生靈。皆朝廷赤子。遭賊劫掠。至此覆巢之下。殺戮必多。俟其向化。歸誠。乃可體。

聖主好生之德。城中軍民聞者，皆感泣咸思自拔。以出賊勢。由是日蹙。五月，奪虎山墩。虎山墩者在平涼城北高數十仞，賊守以精兵。通西北餉道者也。公曰：「此平涼咽喉，得此則餉道絕，城不攻自下矣。」卽率兵仰攻，賊萬餘列火器以死拒戰。公令番休迭進，自巳至午，戰益厲，斬僞總兵二人，賊被殺及墜崖死者無算。遂奪其墩，據之俯視城中，如在掌握矣。因發巨礮擊之，城中恟懼。輔臣乃乞降疏聞。詔赦輔臣罪，撫慰之。六月，公劄授七品官。周昌爲參議道。賫詔入城。翼日，輔臣遣黨獻軍民冊，又遣其子繼正等，繳所受僞敕印。然猶疑懼觀望。公復令周昌同其兄子侍衛保定往諭。輔臣乃薙髮降。公令副都統吳丹入城。

撫定秋毫無所犯。平涼被圍日久，城中食盡，死亡過半。因令地方官賑窮乏，掩骼骸，其老弱之轉徙不能歸者，遣將士分送安插。遠近帖然。初，周昌往招輔臣時，言昌母孫氏殉節死，願以身報國。爲母請旌，因請往。至是，奏旌其母，又奏薊秦省被兵及轉餉各州縣賦皆從之。是月，遣振武將軍佛尼勒敗賊將吳之茂於牡丹園，又敗之於西和縣。北山將軍穆占進攻樂門，敗賊於紅崖，復禮縣。於是僞巡撫陳彭、僞總兵周養民等共率僞官九百餘人，兵四萬八千相繼降。關隴悉平。八月。

上諭閣臣曰：圖海器識老成，才猷練達，以文武之長才兼忠愛之至性，勞績懋著，朕甚嘉焉。其晉封三等公，世襲罔替。時漢中

興安猶爲賊據。平涼慶陽初定。人心尙動搖。公奏請分兵防守。諸隘緩攻。漢興別遣一旅赴湖廣會勦吳逆。有旨命公親率精銳行。公以陝西反側未安。慮有變。疏陳其狀。

聖祖因授都統穆占爲征南將軍。率師赴楚。畱公鎮陝西。議取漢中興安。奏調綠旗兵。檄提督孫思克等赴秦州。趙良棟赴鳳翔。以將軍張勇王進寶各引兵助之。期以明年正月二十日如約。至下張勇等會議以閩勇等謂宜視夏秋收穫豐歉再圖進取。公以漢興山路險峻。夏秋多霖潦。賊守益堅。應如前議。奏十六年正月議上。

上慮克復漢興後宜設重兵。轉餉不易。若俟夏秋則頓兵糜餉。

亦非計。諭令嚴守要隘而分兵赴荊州。會勦吳逆。議遂寢。三月。招撫韓城等縣僞官百餘人。四月。遣兵進逼禮縣。益門。先後敗賊於五盤山。喬家山。諸處。復塔什堡。九月。賜服物。並御製詩二章。十七年二月。奏請分兵兩路。進取漢中。興安。旋奉密諭止之。閏三月。將軍佛尼勒等敗賊於牛頭山。四川總督周有德等敗賊於秦嶺。復潼關堡五寨。四月。慶陽賊袁本秀受吳逆僞劄作亂。公發兵會王進寶討之。斬本秀。餘眾潰散。十二月。疏請輕騎赴京。而奏事宜。許之。十八年二月。還陝。五月。賊犯棧道。益門。鎮。各口。奏請提督趙良棟進臨武寨。相機而行。俟擊破賊壘。分道進征。時湖廣。廣西。平。

上諭。亟殲寶雞之賊。恢復漢興。以平蜀地。七月。破益門鎖。賊毀
偏橋。兵不能進。有詔。嚴督。九月。進取漢中。興安分兵四路。公
親率將軍佛尼勒等。由興安進。命總兵官程福亮爲後援。駐守
舊縣關。諸路將軍畢力克圖。提督孫思克等。由畧陽進。總兵官
朱衣客爲後援。駐守西河。諸路將軍王進寶。總兵官費雅達等。
由棧道進。總兵官高孟爲後援。駐守寶雞。提督趙良棟。由徽縣
進。剋日並發。十月。公師次鎮安。分兵爲二隊。進攻僞總兵王遇
隆。敗之。渡乾玉河。奪梁河關。僞將軍韓晉卿遁入四川。是月。進
寶復漢中。良棟復徽縣。畧陽。畢力克圖復成縣。又復階州。降僞
官十九人。兵三百有奇。十一月。復興安。降僞官三百八十二人。

兵萬四千三百有奇。平利、紫陽、石泉、漢陰、旬陽、白河及湖廣竹山、竹溪、上津等縣皆下之。是月，畢力克圖遣參將康調元復文縣。先是，進寶、良棟捷音先至。

聖祖以公及畢力克圖等遲緩，切責之。至是，捷聞得旨嘉獎。下部敘功。尋命率大軍之半，駐守鳳翔。十九年正月，命

赴漢中轉餉，以濟蜀師。九月，陝督哈占由保甯江直上，擊賊帥譚宏。命發兵爲聲援，以分賊勢。是月，獲奸民楊起隆。初，起隆於康熙十二年，詐稱朱三太子謀作亂於京師。正黃旗周公直家奴陳益聚眾將應之。公直首其事，公卽率兵圍之。陳益等悉就縛。至是，并獲起隆，送京師。二十年，賊犯四川之敘州，調副都

統翁愛率所部往援。復奏請親行。諭仍駐漢中。防守秦蜀。以疾還京。十二月薨。累官至太子太傅。中和殿大學士。兼吏部尚書。世襲三等公。諡文襄。賜祭葬如典禮。明年贈少保。仍兼太子太傅。二十二年。御製碑文立石墓道。雍正二年。加贈一等忠達公配饗。

太廟復命建專祠。御製文刻石以旌之。並崇祀陝西名宦。公器識沈毅。好讀書。羽檄旁午時。披覽不輟。將畧由天授。不居故常察哈爾之役。時禁旅方南。征宿衛盡空。詔選八旗家奴之驍健者。付公北征。公較閱畢。卽起行。不許信宿。所過州縣村堡。騷掠者悉不問。至賊境。下令曰。察哈爾元之後裔。數百年珍

寶山積我軍能破之富且百倍於此眾踴躍無不以當百遂
大破之尋請蠲所過宣府等處田賦以卹邊氓蓋驅烏合以禦
方張之寇非此無以得其死力淮陰所謂驅市人而使戰用不
測之威施不測之賞也公之隨機應變多類此子諾敏襲爵

佟勤惠公事畧

佟發甲 養量 岱 忠愍公國瑤 國鼎 國器 國楨 國印 世德 勤倍公顯彰

公諱佟養性遼東人先世爲滿洲居佟佳以地爲氏遷居撫順爲商販以貨雄一方有識量能役服其鄉人天命初見

太祖功德日盛傾心輸款爲明所覺置之獄潛出來歸賜尙宗室女號曰西屋裏額駙授三等男後隸漢軍正藍旗六年從克遼陽晉二等子天聰五年

太宗命督造紅衣礮初軍營未備火器至是礮成鑄曰天祐助威大將軍征行則載以從公掌焉時漢軍未分旗勅公爲總兵統之官民俱受節制八月從圍大凌河城公秉

上方畧率漢軍載紅衣礮立營於錦州通衢以礮克城西隅臺

降守臺兵。又擊敵城南隅。壞樓堞。翼日。擊東一臺。臺圯。守者宵遁。盡殲之。九月。明兵援錦州。

上遣親軍擊敵。公率漢軍五百從。敵望風遁。明監軍道張春總兵吳襄等。赴援大凌河。乘夜向城。

上督騎兵破之。方追奔。敵兵復陣。公舉礮攻燬敵營。十月。攻克子章臺。臺內兵死者無算。十一月。祖大壽以大凌河城降。詔城中所得鎗礮悉以付公。尋攻克馬家湖臺。自大凌河至廣甯。明所置烽候悉毀之。六年春。

上幸演武場閱兵。公率所轄漢軍試礮。擐甲列陣。

上嘉其軍容整肅。且有克敵功。賜雕鞍良馬一。白金百兩。宴

勞之。七月奉 敕宣諭大凌河投誠各官。察哈爾之役參領顏布祿等坐調遣遲悞罪當死。眾皆言法不當宥。公請懲責而全其生。允之。順治四年薨於位。子普漢襲爵。普漢卒。弟六十襲。遇恩詔。晉三等伯。授都統。六十卒。子國瑤襲。十三年。

世祖追錄舊勲。賜諡曰勤惠。佟氏本以滿洲隸籍。漢軍一門。羣從號多才勤惠。公之從兄弟曰養甲。曰養量。曰岱。其從孫行曰國鼎。曰國器。曰國楨。曰國印。曰鳳彩。皆有聲於時。

佟養甲字陸海。順治二年以內閣學士隨貝勒博洛帥師南征。越明年下杭州。平福建。詔署兩廣總督事。與提督李成棟率兵定廣東。當是時。明唐王朱聿鍵之弟聿鎮據廣州。建號紹武。

養甲與成棟既克惠潮二府急趨廣州令前鋒軍悉用紙帕裹頭僞爲廣州援兵狀以惠潮道印爲公文給守者奪門入揭聿鎮及周益遼諸王宗室世子等二十餘人復與成棟議以南雄韶州兩郡連控江楚肇慶爲粵西咽喉梧州爲粵西門戶宜先撫南部以通江右之援定肇慶以扼兩粵之吭取梧州以固肇慶之藩乃檄總兵葉承恩等進兵南韶成棟進兵肇慶皆投策勦撫三郡悉平會明閣部丁魁楚擁明桂王朱由柳自肇慶竄梧州養甲復令成棟移兵進擊魁楚等皆遁去遂下梧州別遣將取雷瓊高廉四府養甲自駐廣州招降海上四姓賊首鄭昌四年加兵部尙書實授總督兼廣東巡撫時標營將士謫遣四

出廣州僅存兵百餘人。海賊馬元生及白旗賊黃信林芳等窺省垣。兵單集眾數萬，突犯廣州。養甲督官兵守陴，躬冒矢石，扼太平門關外橋梁，激勵鄉勇，殺賊陣斬數百級，生擒百餘人。餘賊遁入海。尋偕成棟、徇增城、順德、東莞、三水、新甯諸邑皆下之。明總兵李成志等以平樂、潯州二郡來降，卽令收左江、右江諸路。六月，招降明趙王裔朱由棧。及其將李自璣。七月，明閣部陳子壯尚書張家玉給事中陳邦彥率眾萬餘攻廣州，指揮楊可觀將翻城爲內應，養甲破其謀，擒斬之。親督兵守禦，成棟亦以兵赴援，焚敵舟，敵敗遁。越六日復來犯，又敗之。時廣州初定，監司守令未及，銓授養甲疏請以廣東布政使耿獻忠爲巡撫，復

簡廉吏請旨酌用。又請移大同兵五千至兩廣資防。勦其頻年隨征士卒增給資糧。示體卹。凡新降將卒才勇者畱營訓練。或分駐要隘。餘令歸農。又請蠲積年逋賦。並允行。先是雷廉二郡珠池。每歲例遣官開採養甲。以地險費繁。奏罷其役。時明桂王據桂林。兩廣人心觀望。有潛附爲應者。乃策遣將士進攻之。疏請造弓矢火器。分遣禁旅進勦黔滇。

上以廣西未定。而恭順王孔有德已奉詔進軍湖南。防勦孫

可望。特諭悉心安輯兩廣。所請俟有德疏報再議。養甲之署兩廣總督也。成棟以總兵署兩廣提督。帥師偕往。旣而養甲奏平定粵嶠。成棟功多。請實授廣東提督。成棟自負功績。以所授

官職未兼兩廣意殊不平。又素與養甲部將郝尙久爭功。有隙。遷怒養甲。五年夏。成棟據南雄叛。受桂王封爵。與江西叛鎮金聲桓爲聲應。養甲遺書贛州守將。令策應。書爲成棟所獲。益恨之。乃以兵劫養甲。擁至肇慶。大罵不屈。遂被害。事聞。贈太子少保。廕一子入監。賜祭葬。入祀昭忠祠。公在粵多惠政。卒之年。歲大饑。人相食。設法賑卹。通糶所全活者甚眾。粵人德之。祀名宦。

佟養量。初與弟佟岱俱爲牛象章京。養量兼理義州屯事。勤於課督。獲糧獨多。崇德八年。與弟岱從克明中後所。及前屯衛順治元年。復與岱從克太原府。二年。養量從定江南。克揚州。及江

陰二城皆以紅衣礮有功。蓋卽勤惠公舊所掌者也。而岱亦從征陝西。敗賊於延安。奪十五艘。養量累官至宣大總督侍郎。薨。岱累官至湖廣總督。召還。順治四年。從恭順王孔有德征湖南。敗賊渠黃朝。選於瀟口北岸。追斬之。衡州進克寶慶。敗明桂王於武岡。拔其城。追至廣西。全州走明總督何騰蛟。六年。從征大同。與都統左夢庚敗賊於傅家嶺。又以紅衣礮攻克渾源州。及朔州。汾州。大谷等城。遷吏部侍郎。十一年。授浙閩總督。坐事免。康熙初。薨。岱之從英親王征江西也。歷下九江南。康南昌。袁州等府。以所俘獲疏聞。且言故明鍾祥。王朱慈若等皆衰殘廢棄。僅存餘喘。請收卹。以彰我朝浩蕩之仁。得旨。故明諸王流

落直省者均令督撫資送來京分別恩養其鎮國將軍以下編籍輸稅自是假故明爲號者皆無所藉既杜亂源而所保全尤多云。

佟國瑤者勤惠公孫也順治十七年襲三等伯投副都統康熙十二年吳三桂反。

上以湖廣鄖陽地界三省山谷扼塞易藪奸且慮賊乘間奪踞特授國瑤鄖陽提督往駐防明年三月襄陽總兵楊來嘉據穀城叛鄖陽副將洪福應之劫所部兵千餘反攻國瑤署國瑤率游擊佟大年等以健丁三百人奮擊賊退復來連日格鬥十餘陣斬首二百餘級賊遁走得旨獎敘加左都督十四年夏洪

福等分五路犯鄖西。復大敗之。追勦數十里。陣斬僞將軍林躍等七人。殺賊兵數百。十五年春。四川叛鎮譚洪犯鄖江北岸。福等出兵應之。國瑤分兵勦禦。敗賊於坪溝。黃畝。九里岡。又渡江。敗賊於南岸。焚其舟。擒斬無算。九月。福遣眾伏鄖江兩岸。以數十艘順流下泊琵琶灘。進逼鄖陽。遲道塞。國瑤與將軍噶爾漢等率水陸兵大破之。晉一等伯加太子少保。十七年。進勦來嘉福於房縣。擒僞副將以下五十二人。獲僞印十二。牌劄二十有。四。房縣保康相繼復。二十一年。授福建將軍。諭以恪遵國憲。安輯兵民。無忘恭敬。疏請增協領以下。驍騎校以上。等官。從之。二十八年。薨於位。賜祭葬如制。子諡忠愍。子海福。襲伯。

爵。又有佟國勳者。忠愍公兄弟行也。順治間。官福建巡撫。招徠百姓。禁防兵倚勢。厲民時巡。按周世科。專用嚴刑。國勳濟以寬仁。多所全活。閩人歸心焉。卒祀名宦。

佟國器。字滙山。順治二年。授浙江嘉湖兵備道。偕副將張國興。擒馬士英。朱大定。并招降白腰賊陸汧等。再遷福建巡撫。獲鄭芝龍父子。交通私書。進於朝。調撫南贛。兵燹之後。田多汙萊。前撫臣請將十二年額賦一律科徵。民情惶懼。國器奏請以未墾之田。交屯道屯廳開墾。民心遂定。山賊曾拱辰。據興國之梅窩。剽掠吉贛二郡。黃鄉賊楊興。受撫復叛。皆遣將討平之。福建甯化等處土寇出沒。次第剪除。所部及鄰境羣盜。畧盡。調撫浙江。

時海氛尙熾。旣擊敗鄭成功於定關。又招降寇黨。廣明旗。勦平阮六等。浙東初定。叛獄繁多。國器平情讞鞫。全活者多以勞疾卒。官浙人。追思祠祀之。

佟國楨。順治初。由拔貢。知無爲州。瀕江田廬。恃三壩爲捍蔽。國楨增築隄四千丈。有奇。名四壩。後三壩圯。而田廬卒無恙。州人賴之。累遷大名府。廣東。陝西。江南。巡道。康熙十三年。由安徽按察使。遷江西布政使。時吳三桂耿精忠相繼叛。賊兵分犯江西。會巡撫白色純。卒大將軍安親王岳樂奏。國楨甚得民心。遂特擢巡撫。十五年。大將軍筋親王喇布以贛州爲江西門戶。投誠將士雜處。彈壓需人。奏。詔國楨暫駐贛州。會廣東從逆提

督嚴自明總兵張星耀等糾眾徧南康乃遣將迎勦於庫鎮埔破其營十七追奔七十餘里斬馘不可數計賊遁南安逆黨王割耳等擁眾犯信豐遣將分三路擊之斬二千餘級賊潰竄南雄尋遣將勦上猶賊復其城敗偽將郭應輔於黃土關斬賊五千有奇復龍泉是年聞大兵克復汀州恐海賊竄入贛境遣將山開道相機恢勦十六年春大破賊於五里排復會昌尋復瑞金先後招撫偽總兵等百五十二人兵萬有六千五月復崇義招降偽總兵等十七人兵萬餘逆渠韓大任素驍悍賊中號小淮陰者也自甯都敗竄萬安國楨慮逸入楚境密調兵赴良口大王廟等處截賊歸路別遣將繞出興國之田村大江口斷賊

糧道賊窘甚鼠突復遣將四路追勦十二月擊賊於鷓鴣寨十七年正月追至老虎洞大破之大任走汀州詣康親王軍門降江西平國楨回南昌加兵部尚書銜明年京察自陳降二級調用四十七年薨於家

佟國印父恆年以驍騎校隨其從父佟養正守朝鮮界之鎮江城殉難贈騎都尉國印襲世職崇德六年隨征錦州擊敗明將李洪步兵

上親統大兵圍明總督洪承疇於松山敵兵有逸入高橋南三臺者國印與都統劉之源用巨礮攻克之殲其眾七年春鄭親王等圍杏山塔山國印皆用礮擊其城下之效功加一雲騎尉

遷工部理事官。命赴錦州督鑄神威礮。十一月隨饒餘貝勒由黃崖口入明邊。時沿邊設臺分防甚固。而國印同都統李國翰屢擊敗敵眾。克邊臺七。又擊敗牆子嶺守兵。八年鄭親王克明中後所進。敗前屯兵。國印以紅衣礮攻其城。風迴礮火傷領下。創甚。攻益力。卒拔之。順治元年晉輕車都尉。尋擢工部右侍郎。累晉三等男。康熙十一年薨。賜祭葬如例子。佟世德襲爵。康熙十三年授副都統。十四年隨貝洞鄂征叛鎮王輔臣於平涼。賊眾迎拒。世德等帥兵擊卻之。賊復據山列陣。世德搗戈直前。搏戰貫其陣。追斬甚眾。十五年同前鋒統領穆占設伏平涼之南山。擒賊偵卒。敗其騎兵。五戰皆捷。復以紅衣礮擊毀賊壘。

覆其軍。尋招降輔臣等。並在事有功十七年。命隨撫遠大將軍圖海規復漢中興安。十九年卒於軍。賜祭葬如禮。

佟鳳彩字高岡。起家香河知縣。擢御史。出爲武昌道。歷河南督糧道。禁運弁苛索諸弊。超遷廣西右布政。時雲南未定。粵西屢更兵燹。人民流離。鳳彩悉心籌畫。轉餉不匱。遷江西左布政。巡撫四川。川省自張獻忠蹂躪後。夔東餘孽及涼州番回劫掠。常及川境。鳳彩疏請修築成都府城。并修江都堰。核茶園鹽井。製戰船火器。事集而民不知。役屢歸。尋授貴州巡撫。手定賦役。全書以絕濫征。蘇積困。依民俗用銀。暫停鼓鑄。罷添設之道員。專責土司。以除劫殺之弊。又疏禁私征。增置驛站。黔困大蘇。內艱。

歸復起撫河南兼理河道兩河爲患歲用銀三四十萬舊皆按
畝以徵至是疏請發帑又請罷協濟輓豆之役從之吳三桂反
大兵絡繹過境鳳彩調變有方民不苦擾康熙十三年以疾乞
休許之總兵周邦甯以士民籲留入告左都御史姚文然言鳳
彩老成練達謹慎和平民愛而信之聞其乞病皇皇如失所倚
宜令力疾視事以順輿情有旨令甯任十六年秋薨於位
賜祭葬如典禮子諡勤信祀河南四川貴州名宦祠所著曰

柄友堂集

佟襄勤公事畧

子忠勇公國綱
曾孫溫僖公補熙

端純公國維
介福等

孫法海

襄勤公諱佟圖賴初名盛年後改今名遼東人其先爲滿洲世居佟佳以地爲氏後以貿易居開原繼遷撫順遂家焉父忠烈公佟養正天命初因從弟佟養性輸款於

太祖導大軍克明撫順忠烈公遂挈家并族屬來歸隸漢軍正藍旗後忠烈之孫曰國綱於康熙二十七年疏言臣先世本係滿洲曾蒙

太祖皇帝諭令與佟佳氏之巴都哩蒙阿圖諸大臣考訂支派敘族譜今請仍歸滿洲事下部議以佟姓官職甚多應仍隸漢軍惟國綱本支許改入滿洲遂爲鑲黃旗人天命六年忠烈公

從征遼陽以功授輕車都尉世職奉命駐守朝鮮界之鎮江城時城守中軍陳萬第濟通明將毛文龍詐令謀者稱兵至各堡皆呼譟城中大驚萬策乘亂據城叛忠烈公被執不屈死之長子佟豐年并從者六十人皆被害詔以次子佟圖賴襲世職卽襄勤公也天聰五年從征大凌河破明監軍道張春援兵有功投兵部右參政崇德五年隨睿親王圍錦州取白官屯六年隨鄭親王復圍錦州取金塔口三台七年攻松山城明人突出騎兵奪我紅衣礮公擊敗之又敗山口步兵攻塔山杏山下其城晉世職爲一等擢都統是時各軍多奉命分畧明邊公以謂不若深入明境直取燕京乃與都統李國翰等奏言

天意歸於

聖主大統攸屬。明國人心搖動。宜因天時。順人事。攻拔燕京。控扼山海。則萬世之基由此而定。

上以犬兵不克。關外四城何能。卽克山海。優旨開諭之。八年。

隨鄭親王收前屯衛中後所二城。加一雲騎尉。順治元年。與都統巴哈納石廷柱招降山東府四州七縣三十有二。擒僞濟王。七月。師圍太原。公獨率數騎東西繞城。相形勢。城中兵突出。且邀擊之。來若風雨。從騎皆失色。公控馬大呼。目光如電。敵兵當之盡靡。引北將入城。大軍一麾乘之。城遂破。質奇捷也。遂招降府九州二十七縣百四十有一師還。賜白金四百兩。尋隨豫

親王勦流賊李自成屢破賊於黃河岸毀其柵獲戰艦十五遂
平河南二年五月軍次江南敗明舟師於揚子江先後攻揚州
及嘉興諸城皆下之晉爵二等男賜蟒服黃金三十兩白金
千五百兩五年授定南將軍與都統劉之源帥左翼漢軍駐寶
慶時湖南賊梁馬進忠等寇衡湘辰永聞陷寶慶公至擊破賊
眾拔其城六年鄭親王帥師征湖廣公分兵趨衡州所向皆捷
陣斬偽總兵陶養用破偽伯胡一清等七營兵於城南乘勝疾
擊連敗之一清窮竄集潰眾萬餘距廣西全州三十里立六營
以自保又破之遂下全州還師駐衡州賊犯常甯遣佐領陳天
謨等馳勦之戰於石鼓洞賊大敗斬其渠二人八年凱旋賜

宴得優賞授禮部侍郎晉爵三等子世襲罔替十三年請老
世祖篤念前勞命加太子太保許致仕十五年薨年五十有
三

上聞之輟朝震悼子祭葬贈少保兼太子太師諡襄勤康熙
十六年

聖祖仁皇帝以

孝康皇太后推恩所生特贈一等公令其子佟國綱襲雍
正元年詔追封佟養正一等公賜諡忠烈入祀昭忠祠與
襄勤公並加贈太師明年勅建襄勤公專祠賜額曰功崇
元祀子二曰國綱國維

佟國綱初任一等侍衛。康熙元年襲一等子。尋任內大臣。十四年察喀爾布爾尼作亂。

上命撫遠大將軍信郡王鄂扎討之。授國綱安北將軍。鎮宣府。賊平乃還。十六年襲一等公爵。授都統。明年疏請改隸滿洲。會俄羅斯遣使費耀多羅等至尼布楚。請定邊界。命國綱偕內大臣索額圖等往議。既抵色校。額圖適噶爾丹侵掠喀爾喀部。召還。令遣人曉諭費耀多羅等。緩期得其復書。奏聞。明年四月。同索額圖等往尼布楚。定議以額爾固納河及格爾必齊河爲界。立碑垂久遠。二十九年秋。命撫遠大將軍裕親王福全征噶爾丹。以國綱參贊軍務。八月朔。師次烏蘭布通。賊騎數萬。

軍山下依林阻水以萬駝縛足臥地背加箱塚蒙以溼氈環列如柵士卒於塚隙發矢銳備鈎距號曰駝城公率兵奮擊方破賊賊突發烏鎗中公遂歿於陣檣至京命皇子及內大臣侍衛迎奠茶酒及將葬

上諭近臣曰佟國綱爲國效力忽爾陣亡每念之痛不能已必須一視其喪朕心庶幾少慰弟國維暨諸臣叩阻再三乃命諸皇子及上三旗大臣侍衛部院大臣皆往送賜祭葬如典禮諡忠勇以長子鄂倫岱襲一等公其騎都尉兼一雲騎尉世職以第三子夸岱襲

世宗朝特贈太傅入祀昭忠祠並敕立家廟鄂倫岱累官

都統領侍衛內大臣康熙四十七年與侍郎接敘等倡議舉皇
八子允禩爲皇太子嚴旨詰責雍正三年坐法死其長子補
熙由廕生補員外郎遷副都統署天津總兵擢江南提督乾隆
元年授漕運總督憂歸補都統五年授綬遠城建威將軍十八
年薨賜諡溫僖次子介福字受茲雍正癸丑進士選庶吉士
由檢討累官吏部侍郎嘗五典會試著有西清載筆錄等書
法海字淵若忠勇公次子也於羣從中最賢康熙甲戌進士由
檢討擢侍講學士入直上書房

上時巡齊魯秦晉吳越朝夕扈從侍皇子講誦十年直詞正
色蒙

聖祖嘉與。謂獨能不欺。徐文定公嘗語方侍郎苞。同官及勲戚。中志在君國。而氣足以舉之。學足以濟之者。首推法公。且曰。上爲諸王擇傳。吾對法某。雖以侍。皇子得過。然臣愚竊謂舍某無堪此者。乙未夏。公遂復侍。皇子學。與方侍郎共事。蒙養齋時。中貴人有氣。後者朝夕傳。旨至公視之。蔑如。辭色閒。無幾。微假借。逾年。巡撫廣東。特參大吏。更鹽政。粵人久而思之。旋奉命。巡察海。亶。歷閩。粵。兩浙。爲忌者所中。廷議以公患噎膈。不勝封疆任。詔落職。赴西甯軍營效力。雍正元年。召還。命督江南學政。二年。授浙江巡撫。召投左都御史。四年。遷兵部尙書。協理禮部事。兼內務府總管。坐事免。詔發西陲。在水。

新處效力九年。召還。乾隆元年。賞副都統銜。管理咸安宮事務。明年卒。年六十有七。無子。以兄子介祿嗣。公嘗謂方公曰。吾與子未面而心傾久矣。子亦知並世有法某否。及督學江南。叩方公廬。出所爲詩。以心腑相示。始知公忠孝發於至誠。嘗恨未得同志合道之人。相與輔成治教。而深惡時人之以虛僞比周。自便其身圖者。然權要畏公。伉直亦多深嫉。公知公賢者。惟徐公方公耳。公寓古寺。終歲不還私室。布衣蔬食。老僕一人。從意。儻然自得。在西陲。偃臥土室。枯寂如老僧。及見王公大帥。動以大義相責。皆人所不敢言云。

佟國維初任一等侍衛。康熙九年。授內大臣。十二年冬。逆藩吳

三柱反。其子應熊居京師。明年春逆黨謀不軌。以紅帽爲號。國維發其事。奉命率侍衛三十人至大佛寺擒獲十數人。械送刑部鞠實。伏法。二十一年。授領侍衛內大臣。尋列議政大臣。二十八年。因係

孝懿仁皇后之父。封一等公。明年七月。大軍征噶爾丹。命參贊軍務。八月。師次烏蘭布通。與其兄都統國綱並率左翼兵進擊。時賊以駝城抗拒。國綱循河岸戰。殲國維。由山腰遶賊。後橫擊之。步騎爭先陷陣。遂破其壘。賊潰遁。師還。坐不窮追。鑄四級。畱任罷議政。後

聖祖兩征噶爾丹。國維皆從。敘功。復所降秩。四十三年。命督

張山東尋以年老解任。四十八年正月。

上召國維與諸大臣並集。傳旨詰問曰。前因有人爲皇太子

條奏。朕降殊諭。示諸大臣。爾曾奏稱。皇上辦事精明。天下人無不知曉。斷無錯誤之處。此事關係聖躬甚大。若日後易於措處。祈速賜睿斷。總之將原定主見。熟慮施行爲善。爾係解任之人。此事與爾無涉。乃身先眾人啟奏。是何心哉。國維引罪。他日又論曰。皇太子允礽前染瘋疾。朕爲國家而拘禁之。後詳察被人鎖。屨之處。將鎖屨物俱令發去。其事乃明。今調理痊愈。始行釋放。朕曾將此情。由用殊書詳諭諸大臣。朕拘禁皇太子時。並無他意。殊不知爾之肆出大言。激烈陳奏者。係何心也。諸大臣情

狀朕已知之。不過碌碌素餐。全無知識。一聞爾所奏之言。眾皆
恐懼。欲立允禩爲皇太子。而列名保奏矣。朕臨御旣久。安享太
平。並無難處之事。臣庶託賴朕躬。亦得安逸得所。今因爾所奏
之言。羣下小人。就中捏造言詞。各大臣侍衛等。俱終日憂慮。若
無生路。此事關係甚重。觀眾人情狀。果符爾所奏。日後難於措
處之言矣。爾聞外間匪類妄言。理應禁止。乃倡造大言。驚駭眾
心。有是理乎。爾維伏罪。請死。諭曰。朕特爲安撫羣下。降旨申
明。非欲有所誅戮也。爾其坦懷。勿懼。五十八年薨。賜祭葬如
例。雍正元年。贈太傅。子諡端純。第三子隆科多。襲一等公。
爵任吏部尚書。兼步軍統領。命總理事務。與川陝總督年羹

蕭並加太保。賜雙眼孔雀翎。四團龍補服。黃帶紫韁。雍正五年。坐黨附。尚書阿靈阿。授敘。年羹堯等。及貪婪不法罪。論死。上召議政大臣等。諭曰。隆科多所犯四十一款罪。不容誅。但念皇考升遐之日。大臣承旨者。惟隆科多一人。朕不忍誅戮。其永遠禁錮。尋卒。賜白金千兩治喪。弟慶福。襲一等公。官都統。兼議政大臣。歷工部。戶部。尚書。授領侍衛內大臣。雍正十三年冬。

高宗命代平郡王福彭爲定邊大將軍。赴北路軍營。還授刑部尚書。出爲兩江總督。調督雲貴。晉太子少保。奏開金沙江。以通川運。調兩廣總督。入覲。尋調川陝。乾隆十年。以四川打箭爐口。

外土司瞻對抗逆不法。疏請調兵勦之。屢克其寨。疏報逆會班滾等乞降。

上以爲未可深信。尋授文華殿大學士。仍畱總督任。十一年夏。疏報班滾遁走。尋報攻克泥日寨。班滾等焚斃。十二年春。召還。命兼管兵部事。以張廣泗代之。廣泗奏班滾實未死。慶福將其子改名德昌喇嘛。仍居班滾大礮。冒稱經堂坐欺飾奪職。逾年。賜自盡。

石忠勇公事畧

子華善

石琳

孫石文炳

石文晟

公諱石廷柱。遼東人。先世居蘇完。姓瓜爾佳氏。父石翰。始家遼東。遂以石爲氏。有子三。長國柱。次天柱。次卽公也。生有智畧。遇事明敏。善用兵。初爲明廣甯千總。天命七年。太祖親征廣甯城。天柱時亦爲千總。出迎。

上見而大喜。曰。我國之人。仍歸我國。賜金印鞍馬。令撫慰城中士民。公遂以城降。投輕車都尉。後隸漢軍。正白旗。十一年。從上討蒙古。巴林部有功。晉爵三等男。天聰三年。

太宗命帥師。搜勦明故將毛文龍所屬諸島。會石城島。以兵來犯。擊斬二百人。俘十九人。以歸。尋從。

上攻明北京。班師至沙河驛。與文臣達海殞。諭城中軍民降之。又收復漢兒庄。率城中將士來謁。五年。明總兵祖大壽築城大凌河。

上親統軍圍之。敵騎出戰。公擒斬甚多。大壽窮蹙。將乞降。其從子澤潤以書繫矢射出城。一以與公。一奏。

上乞令公往與大壽議。公遂同達海等至城南臺下。先遣陣獲千總入城。大壽令游擊韓棟桂偕出迎。公并以其義子可法爲質。公乃踰濠與語。大壽言決計歸順。惟乞大軍速取錦州。俾得妻子相見。公還奏。

上復遣公往諭之。大壽遂出降。七月。隨貝勒岳託等入明。旅順。

凱旋

上親酌金卮以勞晉爵三等子九年貝勒多鐸統師伐明次廣
爾令公及都統阿山率四百人先趨錦州至大凌河西遇明兵
馳告貝勒大軍急赴之敵大驚潰公率所部掩擊陣斬副將劉
應選覆其軍五百擒游擊曹得功及守備三人翼日復攻克一
崇德元年春

上幸演武場以公軍容整肅獎資之十二月命統所部漢軍
同恭順王孔有德懷順王耿仲明智順王尙可喜護紅衣礮隨
大軍征朝鮮明年大軍既克朝鮮其國王李倬降遂征明皮島
公從北隅督戰有功是年七月始分漢軍爲左右翼以公爲左

翼都統

太宗嘗與諸臣論兵事。諭爲將者當以呂尙爲法。公奏言。呂尙能專制闔外生殺。故所向有功。今臣等若有過。下所司逮訊。雖佐領以下。亦當與之比肩對簿。其何以堪。諸大臣以其言過。懇請下部論罪。

春。上特宥之。尋從征錦州。攻克諸屯堡。獲人戶及牲畜甚多。四年。

上統軍駐松山。命公攻南城樓。毀其堞。臺兵不能支。降其守將王昌功等四十餘人。

上登松山南岡。相度城垣形勢。命公隨尙可喜。用礮攻城南。

門之左。公與都統馬光遠先取城西南隅一臺。諸將繼進合攻。城盡墮。其堞會以日暮罷。黎旦復進攻。則敵守禦已固。我雲梯兵不能入。死者二十餘人。公兒子達與漢亦中創。

上召詢諸將。有德仲明可喜。光遠議鑿地道攻城。公以地中有水石。必不可穿。且不能越濠而過。持不可。諸將不聽。穴城卒無功。遂罷攻城。議是歲分漢軍兩翼爲四旗。以公爲鑲白旗都統。初。祖大壽之降也。請歸錦州爲內應。後竟背約。屢抗我師。六年秋。公上言。錦州爲遼左首鎮。我師鑿濠築壘。誓翦滅此。以圖進取。誠至計也。第明以祖大壽爲保障。我兵圍之急。彼必益發援兵。併力一戰。宜及此時。簡精銳分布各旗屯田處。遇警卽並進。

伺其軍動我軍突入轉戰過錦州至松山杏山開敵必敗遁錦州可破矣錦州破則關外八城聞風震動是卽當年瀋陽失而遼陽隨下沙嶺失而廣甯隨順之明效也明援兵從甯遠至松山所賚行糧不過六七日若少挫其鋒勢必速退宜設伏於高橋險狹處掘濠截擊仍以銳師尾其後俾進退無路則彼之援兵盡折而降於我矣洪承疇書生耳所統援遼兵皆烏合雖張聲勢心實怯如祖大壽一失則承疇與諸將縱得遁去亦東市就誅而已彼見我

皇上恩養降將最爲優渥或慕義歸誠亦未可料今明國災異迭見流寇披猖

聖主乘時應運。定鼎中原。機不可失。疏入。

上嘉納之。後皆如公言。大軍之圍松山也。敵乘夜犯漢軍營。公率所部禦擊。斬首十餘級。獲刀甲鎗礮無算。晉爵二等子。七年分漢軍爲八旗。以公爲鑲紅旗都統。順治元年。隨大軍入山海關。敗流賊。偕都統巴顏等勦滅昌平土寇。尋帥師勦撫山東郡邑。復會都統葉臣攻克太原。其山西河南賊寇悉平。之師還。賜白金五百兩。晉一等子。六年。從征大同。叛鎮姜瓖。復渾源。太原朔州汾州等城。十二年。授鎮海將軍。駐防京口。能戢兵安民。民間稱爲石佛。十四年。請老。

上念其宣力年久。命加少保。兼太子太保。致仕。尋晉一等伯。

十八年薨年六十有三。賜祭葬。贈少傅。兼太子太傅。諡忠勇。詔立碑紀功。第三子華善。幼時。豫親王多鐸以女妻之。投和碩額駙。尋任內大臣。康熙六年。以上元節赴宴時。譏誚莊親王博果鐸。奪內大臣。仍留額駙。十三年春。吳三桂反。命爲安南將軍。帥師防守鎮江。鎮海將軍王之鼎。奏耿精忠結連海賊窺伺內地。應調右路官兵。集天甯洲訓練。詔華善督所部兵習水戰。九月。命簡親王喇布爲揚威大將軍。統兵駐江甯。華善與王之鼎等。參贊軍務。十五年。改投平寇將軍。統轄江南滿洲蒙古兵。十六年。簡親王駐江西。疏請增兵。詔華善率所部赴簡親王軍前。聽調遣。十七年。改投定南將軍。命進湖南。駐守茶

陵尋命進守永興。會三桂病死。永興賊解去。華善坐運。遇嚴旨切責。令隨將軍穆占營。領隊效力。明年擊敗僞將軍吳國貴。范齊於永州。華善並有功。二十四年薨。賜祭葬如例。其子石文炳順治中襲其祖忠勇公伯爵。由參領擢總兵。累遷都統。康熙二十八年。授福建將軍。三十九年秋。因其父年老。召還。仍授都統。十一月薨於途。賜祭葬如例。以其子富達禮襲石琳忠勇公第四子也。由佐領兼郎中。康熙元年。按察山東。左遷湖廣。下荆南道。十三年。襄陽總兵楊來嘉副將洪福叛。應吳三桂踞房縣。保康竹山。煽誘醜徒。嘯聚南漳之天門。關山。雞公等寨。琳及總兵劉成龍率師討平之。累遷河南按察。及浙江布

改使其在海南。極值禁旅南征。牧於沱。時當麥秋。琳與統軍約。令次於野。不得入。屢雨。琳坐其帳中。凡四十餘日。民賴以安。在浙江時。耿逆初平。衢郡被兵尤甚。戶口多逃亡。而丁賦猶責。志里甲。琳核實。請免之。軍興既久。供億浩繁。逋欠叢積。琳悉爲釐定。除一切陋規。尤禁加耗。嘗曰。革一分火。耗便可增一分正。供時以爲名言。二十三年。擢湖廣巡撫。會工部以建造太和殿。檄各省採運柁木杉木。琳以柁木產自萬山中。挽運維艱。疏請展限。部議不許。特詔允之。二十五年。調撫雲南。疏言賦役全書中有應行更改增刪者八事。一滇省自明初置鎮設衛。以田養軍。曰屯田。又有給指揮等官爲俸。聽其招佃者曰官田。其

租入較民賦十數倍。猶佃民之納租於田主。我朝開滇之始。吳三桂留鎮。以租額爲正供。相沿至今。積逋愈多。官民交困。宜改照民賦。上則起科。一滇省鹽井有九。以各井行鹽之多寡。爲每年征課之重輕。琅井每斤征課六釐。白井八釐。至黑井則倍之。此明末額外橫征。較明初原額不啻數倍。今請減黑白二井之課。應琅井例征收。一開化府民田。每畝科糧二斗六升三合。較在昔未設府以前。加賦至十倍。應照河陽縣上則起科。一元江府由土改流。三桂於額糧之外。別立名色。凡四端。以元江之山僻。加賦倍征。民不堪命。應請各減其半。一通海縣六寨地糧。較民賦重幾三倍。當改照新定民賦科則。碣嘉縣每糧一石征

條編銀四兩有奇亦爲偏重今旣歸南安州附征卽應與州賦一律每石征銀六兩四分一麗江界連土番古稱荒服三桂叛後割金沙江之喇普地以與蒙番地去而糧存宜刪除一建水州自明時設參將歲派村寨陋規銀三百餘兩糧八十餘石三桂遂編入正額宜裁革一新平縣之銀場易門縣之銅廠礦斷山空宜盡豁課稅疏下所司知之擢兩廣總督四十一年薨於位年六十有四賜祭葬如典禮祀各省名宦祠

石文晟忠勇公長子一等待衛綽爾們之子也性豁達多才畧爲政務舉大綱由蘇州府同知改平陽府知府康熙三十三年諭嘉其居官有聲超擢貴州布政使未幾擢撫雲南疏言滇省

屯田。按民田賦重數倍。積逋纍纍。非軍戶敢頑抗。亦非有司不善催科也。通省民賦最重者。莫如河陽。上則田每畝糧八升。一合有奇。若屯田則五倍之。且有八九倍者。臣叔石琳撫滇時。曾具疏。歷陳未經部覆。請將屯賦悉照河陽縣上則例起科。以甦貧困。特詔允之。舊額十減其六。又請增鄉試解額。以振起人文。三十六年冬。入覲。會安南國王黎維正疏言。臣國牛羊蝴蝶。普闐三處。爲鄰界土司侵佔。請 敕歸還。

上諭及其事。文晟奏。牛羊蝴蝶。普闐三處。自明時卽內屬。我朝開闢雲南。卽在蒙自縣。征糧至康熙五年。改歸開化府。并非安南地。彼輕聽妄言。擅具奏。復遣兵伺邊。臣與督臣仰體。

皇上柔遠至意。令防衛者勿輕動。臣愚以此地久入版圖。所請不宜允。下。詔切責。老回滇疏。改兆勝州爲永北府。下部議。行四十二年。調廣東巡撫。明年擢湖廣總督。尋罷任。五十九年。薨。年七十有八。

愛敬康公事畧 子恭懿公富善

公諱愛星阿。姓舒穆祿氏。滿洲正黃旗人。祖武勳王揚古利。世居渾春。其父郎柱。爲庫爾喀部長。率所部來歸。

太祖厚遇之。命其子揚古利入侍。郎柱爲部人所害。圍其家。其妻負幼子。納穆泰於背。屬鞬佩刀。突圍出。以其族來歸。未幾。庫爾喀舉部內附。武勳王察知部人之殺其父者。手刃之。啖其耳。鼻。時年甫十四。

上深異之。日見信任。且尙主焉。始令守汎江上。警備嚴密。無敢犯者。從征輝發。阻大水。眾難之。武勳王率先逕渡。大獲而還。取訥殷部及朱舍里等路。皆有功。從征哈達。擒其貝勒。以歸。奉

命收蜚悠城戶口侍衛扈爾漢以兵二百禦烏喇兵萬人方據山谷結營相持武勳王勵眾曰吾儕平居相謂與其死於疾無甯死於敵此非臨敵時乎乃持矛突入斬烏喇兵七人敵稍卻諸貝勒兵踵至併擊大破之征赫席黑木倫等路越重柵而進衝鋒奪險常爲眾先及再征烏喇攻青玉河敵勢甚銳

太祖遣使持信矢召諸將退武勳王獨麾眾薄城疾攻拔之從擊明兵於界藩先馳敵被傷褻創奮擊大破之進擊尙開崖有旨令被創者勿行武勳王獨率佐領兵憑高馳擊大破明兵於沙命六年大兵取瀋陽乘勢取遼陽皆先登陷陣又敗明兵於沙嶺

上嘉其績。且閔其傷。命位次八貝勒。下統左翼兵。授一等子。世襲罔替。兼諭勿更臨戰陣。十年。明總兵毛文龍以兵三百人夜入耀州。復帥師殲其眾。天聰元年。從征朝鮮有功。三年。秋。及副都統阿山躡緝逃人至雅爾古。遇文龍所遣採澆者。斬九十六人。擒千總三人以歸。尋隨。

太宗親征。敗明總兵滿桂軍於燕京之北。師旋。畧通州。火其船。遂取張家灣。明兵來援薊州。我兩紅旗護軍兵少。卻武勳王鼓勇直前。敗敵兵。命以兩紅旗罰餞予之。卽以分賜將士。六年。上親征察哈爾。命同貝勒阿巴泰等畧守。七年夏。

上以征明及朝鮮察哈爾三者何先。諭詢諸大臣。武勳王奏。

宜深入明境。朝鮮察哈爾自當歸順。且極言用兵不可緩。上於是決計攻明。命帥師往畧山海關。明年晉超品一等公。仍管六佐領事。世襲罔替。賜敕免死罪三次。從攻大同宣府。拔靈邱。墮王家庄。斬其知縣守備官。崇德九年。與武英郡王阿濟格等帥師直入明境。攻克關隘。至安州。下昌平等十二城。五十。八。戰。皆捷。俘獲億萬計。二年。

太宗親征朝鮮。其全羅清忠兩道兵來援。營於南漢城。會天大雨。雪晝晦。從豫親王多鐸進擊敵兵。追及山嶺。有朝鮮敗卒竄伏崖側。竊舉礮。重傷而薨。年六十有六。王自結髮從軍。大小數百戰。被創滿身。不少挫。而持身敬慎。歷事兩朝。恩遇殊絕。

太宗嘗命護軍爲之守門。賜豹尾槍二令親軍佩之。甲卒二十人爲之衛其卒於軍也。

太宗解御衣衣之哭之慟親視含殮比葬復親臨奠醴置守冢八戶追封武勳王建碑墓道順治中配饗

太廟

聖祖復御製碑文紀其功雍正九年加封號曰武誠次子塔瞻襲爵敬康公之父也順治八年

世祖皇帝追念武勳王功績加給敬康公輕車都尉俸尋授領侍衛內大臣十六年大軍征雲南明桂王朱由榔與其黔國公沐天波等奔緬甸僞晉王李定國奔孟良僞鞏昌王白文選奔

木邦

世祖命吳三桂移平西藩屬鎮雲南十七年三桂疏請發兵入
緬滅由榔以除邊患詔加公定西將軍與都統卓羅果爾欽
遜塔護軍統領畢力克圖費雅思哈前鋒統領白爾赫圖等率
禁旅會同三桂進征十八年九月師次大理秣馬逾月出騰越
州取道南甸隴川猛卯十一月至木邦擒偽副將馮國恩訊知
定國走景線文選與定國不睦屯兵錫箔江公令費雅思哈等
先簡精銳疾馳三百餘里至江濱文選已毀橋道走茶山大軍
至結筏以濟別遣總兵馬甯等追勦文選公及三桂領兵趨緬
先是三桂屢檄諭緬人令擒獻桂王緬會莽猛白盡殺桂王從

官沐天波王維恭馬吉翔等數十人密使人守桂王謀生擒以獻十二月大軍次舊挽波距緬城六十里緬酋使人詣軍門請遣兵百人薄城公遣白爾赫圖率前鋒百人進次蘭鳩江復令畢力克圖等率護軍二百自後策應緬人聞大兵將薄城以船載桂王與其親屬及故從官妻女獻軍前時文選爲馬甯等追及於猛養度不能脫率眾數千降定國竄死猛獵康熙元年奏捷優詔嘉獎命振旅還京師仍爲內大臣加少保兼太子太保予世襲一等公敕書三年二月薨賜白金三千兩治喪賜祭賜葬謚敬康子富善襲一等公爵十九年授領侍衛內大臣三十五年春

聖祖以噶爾丹背約肆擾分路進討 命撫遠大將軍費揚古
出西路

親統大軍出中路富善領鑲紅旗兵隨征 駕駐沙河 諭之
曰古北口一路兵眾以爾統之所過城池村舍其悉遵朕法令
勿絲毫擾民其有以捕獸馳騁竭馬力者並飭禁之四月 駕
駐西巴爾臺遊噶爾丹所居之克魯倫河計程五日議者謂宜
俟西路兵會勦富善奏言西路兵至尙須時日慮賊聞風竄卽
以中路兵勦賊未爲不足宜乘其不備速遣精兵擊之奏入稱
旨卽 命進征克魯倫河會噶爾丹知
上親征盡棄其廬帳牲畜器械潰竄

上已密諭費揚古等絕其歸路先整兵特勒爾濟口以待陣斬二千餘級噶爾丹僅以身免降厄魯特部眾千餘人

上命班師每行營閱選駝馬徵輸芻粟富善承旨以行咸當上意冊功加太子太保嘗扈蹕至會岐口有疾

聖祖親臨視賜醫藥四十七年薨賚白金二千兩詔遣官經紀其喪子祭葬如典以子海金襲雍正八年敕建賢良祠敬康公及富善並入祀乾隆元年追諡富善曰恭懿